

REGLUGERÐ

um lögreglustjórásáttir.

1. gr.

Markmið og gildissvið.

1. Markmið reglugerðar þessarar er að samræma meðferð mála sem lögreglustjórum er heimilt að ljúka skv. 1. mgr. 115. gr. laga um meðferð opinberra mála nr. 19/1991 ásamt síðari breytingum.

2. Akvæði reglugerðarinnar taka til mála sem heimilt er að ljúka með sektarboði lögreglustjóra og til mála sem lögreglustjóra er heimilt að ljúka með sektargerð sem sakborningur gengst undir með undirritun sinni. Sektarboð og sektargerðir lögreglustjóra teljast til lögreglustjórásáttá.

2. gr.

Lögregluskýrslur.

Gera skal lögregluskýrslu um öll brot sem lögregla hefur komist að eða kærð hafa verið til lögreglu. Efni og umfang lögregluskýrslu skal vera í samræmi við eðli brots og alvarleika. Leitast skal við að staðla sem mest lögregluskýrslur vegna algengra minniháttar brota.

3. gr.

Heimild til að ljúka málum með lögreglustjórásátt.

1. Berist lögreglustjóra kæra um brot sem hann hefur ákærvald um samkvæmt lögum um meðferð opinberra mála, er honum heimilt að ljúka því með sektarboði eða sektargerð, enda fari viðurlög við broti ekki fram úr sviptingu ökuréttar allt að einu ári, verðmæti þess sem gera á upptækt ekki fram úr kr. 35.000 eða fjárhæð sektar ekki fram úr kr. 100.000.

2. Þegar mál hefur verið skráð í málaskrá skal lögreglustjóri ákveða hvort því megi ljúka með sektarboði eða sektargerð. Eigi lyktir máls að færast í sakaskrá samkvæmt reglugerð um sakaskrá ríkisins er óheimilt að ljúka því með sektarboði.

3. Lögreglustjóra er heimilt að fela löglærðum fulltrúum sínum að ákvarða sektir skv. 6. og 8. gr. Þá getur lögreglustjóri heimilað lögreglumönnum að ákvarða sektir skv. 6. gr., þ.m.t. skv. 5. mgr. þeirrar greinar.

4. gr.

Lögsagnarumdæmi.

1. Lögreglustjóri í umdæmi þar sem brot var framið, tekur ákvörðun um það hvort sakborningi skuli gefinn kostur á að ljúka máli með sektarboði skv. 6. gr. Hann skal enn fremur fylgja sektarboði eftir með ítrekun ef því er að skipta. Ef máli lýkur ekki með greiðslu sektarboðs og sakborningur á lögheimili eða fastan dvalarstað í öðru umdæmi, skal lögreglustjóri að jafnaði senda málið til lögreglustjóra í því umdæmi til frekari meðferðar. Þó skulu mál vegna brota sem framin eru í umdæmum lögreglustjóranna í Reykjavík, Kópavogi eða Hafnarfirði að jafnaði ekki send á milli þeirra umdæma, ef sakborningur á lögheimili eða fastan dvalarstað í einu þeirra.

2. Mál sem reglugerð þessi tekur til skulu að öðru leyti rekin í umdæmi þar sem sakborningur á lögheimili eða fastan dvalarstað. Ef sakborningur flytur lögheimili eða dvalarstað milli umdæma eftir að málsmeðferð er hafin skal framsenda málið til lögreglustjóra í umdæmi því sem sakborningur hefur flutt til og halda málinu áfram þar.

3. Ef sektarboði er ekki sinnt, skal lögreglustjóri kanna hvort fleiri mál séu til meðferðar í öðrum umdæmum á hendur sama sakborningi. Skulu lögreglustjórar koma sér saman um hvar málin skulu rekin og sker ríkissaksóknari úr ef ágreiningur verður.

5. gr.

Sektarfjárhæðir og önnur viðurlög.

1. Um viðurlög vegna brota á umferðarlögum gilda ákvæði reglugerðar um sektir og önnur viðurlög vegna brota á umferðarlögum.

2. Um viðurlög vegna annarra brota sem lögreglustjórar hafa ákærvald um, og heimild skv. 1. mgr. 3. gr. nær til, fer samkvæmt skrá og leiðbeiningum sem ríkissaksóknari lætur lögreglustjórum í té.

6. gr.

Sektarboð lögreglustjóra.

1. Ákveði lögreglustjóri að gefa sakborningi kost á að ljúka máli með greiðslu sektar og niðurstaða máls færist ekki í sakaskrá, sendir hann sakborningi, innan mánaðar frá því honum barst kæra, greiðsluseðil með sektarboði. Lögreglustjóri getur þó ávallt ákveðið að máli skuli lokið skv. 8. gr. þótt niðurstaða þess eigi ekki að færast í sakaskrá.

2. Í sektarboði skal koma fram dagsetning sektarboðs, nafn sakbornings, kennitala og heimilisfang, númer máls, stutt lýsing á broti, hvar og hvenær það var framið og þau refsíákvæði sem það varðar við. Greint skal frá því að sakborningur eigi þess kost að ljúka máli með greiðslu tiltekkinnar sektar, og sakarkostnaðar ef því er að skipta, innan 30 daga frá dagsetningu greiðsluseðils. Í sektarboði skal tekið fram að greiði sakborningur sektina færast þau málalok ekki í sakaskrá. Þegar um umferðarlagabrot er að ræða skal koma fram í sektarboði hversu mörgum punktum brot varði samkvæmt reglugerð um ökuferilsskrá og punkta-kerfi vegna umferðarlagabrota.

3. Ákveði lögreglustjóri að nýta sér heimild umferðarlaga til að veita afslátt af sektarfjárhæð skal koma fram í sektarboði að veittur sé afsláttur ef sektin ásamt sakarkostnaði greiðist að fullu innan 30 daga frá dagsetningu greiðsluseðils. Afsláttur skal ekki veittur af sakarkostnaði.

4. Ef sakborningur sinnir ekki sektarboði, skal senda honum, innan 10 daga frá lokum frestsins, ítrekun þar sem honum er gefinn 20 daga frestur til að samþykkja sektarboðið með greiðslu. Þá skal koma fram í ítrekunarbréfi að sinni sakborningur ekki sektarboði taki lögreglustjóri ákvörðun um saksókn eftir almennum reglum laga um meðferð opinberra mála.

5. Ef sakborningur, sem vill ljúka máli með greiðslu sektar samkvæmt þessari grein, kemur á skrifstofu lögreglustjóra innan 30 daga frá dagsetningu greiðsluseðils og fer fram á greiðslufrest, skal gefa honum kost á að gangast skriflega undir sektargreiðslu og vara-refsingu með sektargerð skv. 8. gr.

7. gr.

Greiðsla sektar á vettvangi.

Lögreglustjóra er heimilt að fela lögreglumönnum að bjóða vegfarendum, sem þeir standa að brotum á umferðarlögum eða reglum settum samkvæmt þeim, svo og brotum á lögreglusamþykktum, að ljúka málum með greiðslu sektar og taka við greiðslu, þ.á m. með kreditkortum. Ákvæði þetta tekur aðeins til mála sem heimilt er að ljúka skv. 6. gr.

8. gr.

Sektargerðir lögreglustjóra.

1. Ákveði lögreglustjóri að gefa sakborningi kost á að ljúka máli með sektargerð, sendir hann honum, innan mánaðar frá því honum barst kæra, boð um að mæta á skrifstofu lögreglustjóra innan 14 daga frá dagsetningu þess.

2. Í boði skal koma fram dagsetning, nafn sakbornings, kennitala og heimilisfang, númer máls, stutt lýsing á broti, hvar og hvenær það var framið, refsíákvæði sem það varðar við og að sakborningi verði gefinn kostur á að ljúka málinu með sektargerð. Í boði skal að jafnaði tilgreina fjárhæð sektar auk sakarkostnaðar þegar um hann er að ræða, tímalengd sviptingar ökuréttinda og upptöku eigna, ef því er að skipta. Þá skal tilgreina lagagrundvöll vararefsingar og tímalengd varðhalds. Vararefsing ákvarðast samkvæmt ákvæðum almennra hegningarlaga. Taka skal fram hvort niðurstaða máls færist í sakaskrá og ennfremur að mála- lok hafi sama gildi um ítrekunaráhrif og dómur ef því er að skipta. Þegar um umferðarlagabrot er að ræða skal koma fram í boði hversu mörgum punktum brot varði samkvæmt reglugerð um ökuferilsskrá og punktakerfi vegna umferðarlagabrota

3. Ef sakborningur kemur á skrifstofu lögreglustjóra innan 14 daga, játar brot og lýsir sig reiðubúinn til að ljúka máli með þeim hætti sem fram kemur í boðinu, gengst hann skriflega undir sektargerð með undirritun sinni á boðið. Heimilt er að veita allt að 30 daga frest til greiðslu sektar og sakarkostnaðar samkvæmt sektargerð. Þó er heimilt, ef sérstaklega stendur á, að ákveða í sektargerð að sekt og sakarkostnaður skuli greiðast með afborgunum, sem dreifast á allt að sex mánuði.

4. Leiðbeina skal sakborningi um þýðingu vararefsingar.

5. Ef sakborningur greiðir ekki sekt og sakarkostnað samkvæmt sektargerð, en kemur á skrifstofu lögreglustjóra innan 30 daga frá undirritun gerðarinnar, er heimilt að gera við hann afborgunarsamning til allt að sex mánaða.

6. Afborgunarsamningur skal hafa ákvæði þess efnis að verði dráttur á greiðslu einstakra afborgana sé öll sektin í gjalddaga fallin. Einnig skal koma fram að fjárnám megi gera til fullnustu sektargerðar eða vararefsing verði afplánuð.

7. Ákveði lögreglustjóri að nýta sér heimild umferðarlaga til að veita afslátt af sektar- fjárhæð skal það koma fram í boði til sakbornings að veittur sé afsláttur ef sektin og sakar- kostnaður greiðist að fullu innan 30 daga frá dagsetningu sektargerðar. Afsláttur skal ekki veittur af sakarkostnaði. Heimild til að veita afslátt af sekt gildir þó ekki ef sektargerð er gerð í kjölfar sektarboðs sem sakborningur hefur ekki sinnt.

8. Ef sakborningur sinnir ekki boði, skal senda honum, innan 10 daga frá lokum frests- ins, ítrekun þar sem honum er gefinn 14 daga frestur til að koma á skrifstofu lögreglustjóra og gangast skriflega undir sektargerð. Þá skal koma fram í ítrekunarbréfi að sinni sak- borningur ekki boðinu taki lögreglustjóri ákvörðun um saksókn eftir almennum reglum laga um meðferð opinberra mála.

9. gr.

Sektarboði eða boði um sektargerð synjað eða ekki sinnt.

Ef sakborningur sinnir ekki eða synjar sektarboði skv. 6. gr. eða boði um sektargerð skv. 8. gr., tekur lögreglustjóri ákvörðun um saksókn eftir almennum reglum laga um meðferð opinberra mála.

10. gr.

Greiðslufall sektargerðar.

1. Lögreglustjórar annast innheimtu sekta.
2. Lögreglustjóra ber að leita fullnustu sektargerðar með aðför, nema hann telji það þýðingarlaust. Um aðför fer eftir fyrirmælum aðfararlaga um aðför eftir sátt sem komist hefur á fyrir yfirvaldi.

11. gr.

Afplánun vararefsingar.

1. Ef lögreglustjóri telur að innheimtuaðgerðir séu þýðingarlausar eða fullreyndar, skal hann ákveða að vararefsingu verði beitt. Tilkynning um fyrirhugaða afplánun vararefsingar skal send sakborningi þegar ljóst þykir að innheimtutilraunir muni ekki bera árangur. Tilkynningu skal senda með sannanlegum hætti í síðasta lagi 10 mánuðum eftir dagsetningu sektargerðar.
2. Sé sekt hvorki greidd né fullnægjandi trygging sett fyrir greiðslu og tilkynning skv. 1. mgr. hefur verið send, skal lögreglustjóri svo fljótt sem unnt er óska eftir að Fangelsismálastofnun ríkisins ákveði stað og stund fyrir afplánun vararefsingar. Ekki skal líða lengri tími en eitt ár frá sektarákvörðun þar til slík beiðni er send stofnuninni.

12. gr.

Innheimtukerfi fyrir sektir.

Á öllum stigum sektarákvörðunar og innheimtu skulu upplýsingar um stöðu máls skráðar þannig að unnt sé á skjótan og einfaldan hátt að fá yfirlit um stöðu máls hverju sinni.

13. gr.

Eftirlit ríkissaksóknara.

1. Ríkissaksóknari á rétt á að fá skýrslur um málalok samkvæmt ákvæðum reglugerðar þessarar eftir þeim reglum sem hann ákveður.
2. Telji ríkissaksóknari að saklaus maður hafi verið látinn gangast undir viðurlög skv. 1. mgr. 115. gr. laga um meðferð opinberra mála nr. 19/1991 ásamt síðari breytingum eða að málalok hafi verið fjarstæð að öðru leyti, getur hann innan mánaðar frá því að honum barst vitneskja um þau, fellt gerðina úr gildi, enda sé þá ekki liðið ár frá málalokum.

14. gr.

Gildistaka o.fl.

1. Reglugerð þessi, sem sett er með heimild í 1. og 4. mgr. 115. gr. laga um meðferð opinberra mála, nr. 19 26. mars 1991, sbr. 5. gr. laga nr. 57 22. maí 1997, öðlast þegar gildi.
2. Frá sama tíma falla úr gildi reglugerð um sektargerðir lögreglumanna nr. 187 12. maí 1993 og reglugerð um lögreglustjórásáttir nr. 250 29. júní 1992 ásamt síðari breytingum.

Dóms- og kirkjumálaráðuneytinu, 16. janúar 1998.

Þorsteinn Pálsson.

Benedikt Bogason.